

sier Francesco Falier provedador sora i danari, fe' lezer la so' parte di far li Procuratori, la qual da niun di Colegio era sentita, perchè quelli vol esser non vol dar danari; et cussì ozi si meterà *etiam* di far officii per trovar danari, perchè horamai non si atende su altro che a far officii per danari, et si troverà ducati 45 milia e più per questi tre Procuratori. *Etiam* fo stridà Domenega di far, il primo Gran Consejo, luogotenente in Cypro, che manca assai, per aver danari.

126* Fo ordinà *etiam* a sier Andrea Foscarini e sier Zuan Venier cassieri, mandino a sollicitar sier Lorenzo Orio dotor e sier Zuan Dolfin, electi avogadori, portino li danari, *aliter* li farano in loco loro. Il Dolfin fin qui nulla à dato, e l'Orio ha dato *solum* ducati 900 di ducati 2500 promesse dar.

Da poi disnar, fo Pregadi et leto le soprascripte letere, et una intercepta che *Andrea dal Borgo scrive da Verona a l'Imperador*. Come à fatto compra di minali 20 milia formenti di Romagna, et averà la trata dil Papa, per tanto li mandi ducati 3000, perchè si vadagnerà di essi più di ducati 2000; et in Verona è gran carestia: non è biave etc.

Fu posto, per sier Francesco Falier provedador trovar danari solo, una parte, di far tre Procuratori, uno per Procuratia, in tre Consigli per questa volta *tantum*, la qual parte non se intendi presa si la non sarà presa et posta in Gran Consejo, *ut in parte*; la copia sarà qui avanti. Fo lecta per Alberto Tealdini secretario, et fu presa. Ave 118 di si, 36 di no. Et suo collega sier Alvise da Molin era in Pregadi et non volse meter nulla, ni tre savii dil Consejo, sier Antonio Grimani procurator, sier Francesco Bragadin, sier Luca Trun, e li Savii di terra ferma non volseno esser in la parte.

Fu posto, per il dito sier Francesco Falier, *etiam* far uno quarto Provedador a le biave con li modi come è li presenti, et fu presa; la qual *etiam* se dia meter a Gran Consejo. Ave 125 de si, di no 24.

Fu posto, per li Savii tutti, mandar al sanzacho di Bosina uno presente di una vesta d'oro e la fodra e donar al suo orator, ch'è christian, maestro Matio medico, una vesta di raxo . . . e la fodra; sichè in tutto si spende ducati 150; et fu presa.

Fu posto *iterum*, per li Consieri, Cai et Savii, la parte di dar la coladena a sier Andrea Badoer el cavalier, che li donò il Serenissimo re d'Ingaltera, per non esser stà presa prima, vol i quattro quinti; et balotata ozi do volte, non fu presa. Ave: la prima volta 119 di si, 45 di no; *iterum* balotata, 115 di si, 47 di no; non è presa alcuna cosa.

Fo posto, zoè balotato, li Procuratori di San Marco, et rimasto tre, quali siano sora i debitori a Rialto, et fo balotati questi:

† Sier Antonio Trun procurator.
 † Sier Tomà Mocenigo procurator.
 † Sier Zacaria Gabriel procurator.
 Sier Nicolò Michiel procurator, dotor et cavalier.
 Sier Marco Bolani procurator.
 Sier Zorzi Corner el cavalier, procurator.

Et li altri do era di Colegio et il Griti è provedador.

Fu posto, per sier Filippo Capelo provedador 127 sora il cotimo di Damasco, una parte zercha i debitori di quel cotimo, debino pagar quanto è debitori fra termine di un mexe, et sconti et fazi le so' raxon, con altre clausole, *ut in parte*, molto longa. Non sincere 3, di no 6, di si 98; è presa.

Fu posto, per el dito, un'altra parte, che li danari di cotimo non possino esser mal ministradi; e atento sia stà trato letere in li Provedadori di cotimo di cambio da esser pagadi, dice spesi in opera virtuosa, però non sia acetà tal letere etc. *Item*, li consoli di Damasco 6 mexi avanti il partir suo debano far far eletion di do Provedadori di cotimo, con altre clausole: 2 non sincere, 3 di no, 97 di si, et fo presa.

Fu posto, per il dito: è stà electo per i Consoli diversi scodadori a marine a' tempi di nave, i quali non hanno dato li conti; però siano obligati in termine di zorni 15 di aver dato li conti di bona administration, soto pena, *ut in parte*: 2 di no, 99 di si, fo presa.

Fu posto, per sier Giacomo Alberto, sier Ferigo Contarini provedadori sora il cotimo di Alexandria, atento fusse *alias* preso che li gotoni di Cypro prestì ducati uno per sacho, però sia preso che quelli hanno auti li ditti danari debano in termene di zorni 15 aver satisfato, *ut in parte*; e li Provedadori di cotimo di li danari recupererano possino tuor merze et metalli, et quelle mandarle in Alexandria a beneficio di cotimo, *ut in parte*. Fu presa. Ave

Da poi venuto zoso Pregadi, vene letere di 127* campo, da *Spiran*, di sier Andrea Griti procurator, provedador zeneral, di 13, hore una di note. Come le artellarie francese erano aviate, et cussì il conte Piero Navaro con 5000 fanti di la sua banda et altre fantarie francese; sichè era restato a sollicitar il mandar di le zente, et par il Gran conte-